

Christian Meivah

November - December, 2019

Lhani seh thuso

Private Circulation

**Christmas ipi ham ?**

Kum seh in Christmas aum in, hiteng le hin idon ivai, insung mite ho toh kimutoa kipa khomna phat in imang jiuve. Sum jong tampi pi akisumang jin ahi. Ikipa nau thupi chu ahileh, vannoti huhhingpa Jesu ahung peng tai, tihi ahi. Ahileh, idia Christmas hi hibanga ithupi sah-u ham ? tivang igel thuhjep ji pouve. Anikho hi Jesu Christa pen nikho ahin, ama hi eihuhhing puu ahi, tihi ahipene.

Huhhingpu penni ahi, kiti jongle kei eihuhhing tai, tihi apan lou le ima aphachom poi. Jesu hi amaa ding ahi tia, lalou ho chun Christmas kipapi jongleu, panna bei ahi. Jesu nang dia koi ham, tihi nahet mong hitam ? Kikhol in. Jesu hi mi dinga nagel ham, nangma dia nagel ham ? Vannoti a mihem hijatpi penga jong, Jesu hi eihon achom beh a isah lut nau ajeh nahet them angai-e. Mi tinin pen nikho anei cheh in, ahinla pen nikho lah lah-a athupi pen hi Jesu Christa pen nikho hi ahi.

Mi tampi athi tai, ahinla Jesu thi banga thi aumpo lai-e. Apen jong kidang kisa, chule athina jong ki dang kisa ahi. Hijeh ahi Jesu hi eiho

dia chombeh ahi. Vannoti mihem tam pin Jesu penni anit ahin, chule mihem atam jon Jesu thini jong loupitah a anit ahi. Amahi akidange. Chu le hou lamkai koima dang athi jouva hing doh aum pon, eihon Jesu hin kit hi ikipa piuvin, inith cheh ui. Jesu hi aloupi !

Jesun lei-a hinkho aman chu Pa Pathen in alunglhai pilheh in, chu le Jesu chungu Pathen akipah lheh in ahi. Pathenin mihem anasem, chungu kishina ana nei-e, oh, ana semda taleng tina lung ahin nei in ahi (Gen. 6:6). Pakai Jesun jong, Judas Iscariot hi ana penglou hitale ong, tina lunggel ana nei in ahi (Mat. 26: 24). Mihem khat athi leh eihon lampi nia konin, khat pen penin, inith peh jiuve.

Mipha khat athi leh van gam kal tei din itahsanui. Chubang tah in ilung gim pouve. Ahinla michonse, sei ngailou khat athi tengleh nommo isa jiuve, ajeh chu ama chu in-noma kile louva, damun meikou lam ajot ahi, ti itahsan ui. Osama bin Laden athi chun, vannoti a gam tampin aki pa piuvin ahi. Ajeh chu aman mi ana sugen thei in, mi ana that in ahi. Leng Pharaoh in apen nikho anit ni chun lamkai tamtah pi nekhom ana bol pin ahi. Milun chujatpi maikoh tah

a chun, ama neh dia changlhah sema thempen pa chu ana khailih in ahi (chief baker). Ama chu a-milun ho lah a khat anahi (Gen. 40:20-22). Herod lengpa pen nikho la iti em ? Herod lengpan apen nikho anit ni chun, lamkai len ho leh sepai lamkai len ho chule Galilee a milun ho jouse akouvin, nekhom ana bolin, chule hiche nikho chun, Baptist John chu alol ana tanin ahi (Mark 6:21-28). Baptist John chu midih le mitheng anahi (Mark 6:20).

Vetan, Jesu pen nikho kinit na toh akikheh dan hi ! Nungah thengsel a kona Pathenin kidang tah a Jesu ahin pensah ahi. Jesu pen banga pengkha kija loulai ahi. Apen ding, ahinkho man ding dan, chule athi ding dan ho kima seidoh sohkei umkha loulai ahi. Ahinga mihem mit mua van gama lahtouva koi umkha tam, Jesu tilouva ? Vannoti mihem atam jon ahinkho thu asim jing hi Jesu tailou koi uma ham ?

Pharaoh chu Egypt mite lengpa ahi. Herod chu Jew ho leng pa ahi. Ani lhona apen nikho anit uva chu alamkai lenho nekhom abol peh-u ahi. Hitobang kipana neh khom abol niuva chu, changlhah sem thempa chule Baptist John chu ki that ah anahi. Pharaoh leh Herod banga Jesu jong hi leng ahi (John 18: 37). Kum seh in Jesu penni nekhom kipana ibol uve. Jesu apen chun athisa ahin sah-e. Lazarus kiti pa hi thia, akivui kal nili ahitan, Jesun

2

athina lhana chun ana hinsah kit-e (John 11). Numei mitoh achonset pet a kiman doh nu chu Jesun songa akiselih masangin ana huhdoh in ahi (John 8). Jesu pen hin, mi tampi tah ahinsah in, tonsot hinna apei (John 3:16).

Jesu joh doh a pang Judas Iscariot chu, Jesu seijui khat anahi. Ama phat lou jeh in, Jew hon Jesu amat lon ahi. Avangset dan chu, ama jong akikhai lih in ahi. A Pakai ajoh chu aman jong athiloi. Jesu cross a khai lih dia pedoh chu Pontius Pilate ahi. Judas Iscariot jong chule Pilate jong, anilhonin ama leh ama anaki that lhone. Ani lhonin athin, khatcha jong ahing doh deh tapoi. Amani jeh a Jesu chu cross a kikhai lih anahin, ahinla Jesu chu thinaa konin athou doh kit in, ahing in vana akale.

Nikhat leh Jesu vana kona hunga ama tahsan ho chu van gama dia apuitou ding ahi (John 14:3). Jesun, keima Lampi, Thutah chule Hinna kahi (Jn. 14:6) tin anasei-e. Eiho hi eima chang kihuhhing thei kihi hen lang, ahiloule mi khat in eihuhhing thei hitaleh, Jesun keima Lampi, Thutah chule Hinna kahi, ati louhel ding anahi. Pa kom lhunna ding lampi ama bou ahi tia Jesun ana sei louhel ding ahi. Jesu tilou eihuh hing thei-u midang um taleh Jesu ama bou mi huhhing thei-a kisei lou hel ding ahi. Hijeh chun, nang dia Jesu apen hi kipah in, mi koi hijongle Jesu tahsan chan chu mangthah lou ding ahi, hi phaten tahsan ute.

Jesu Christa Pathen chapa

Vannoi a hat chungnung pen hi, alim akimu lou vangin, kichat jeh ham ahiloule ikipana pen ham jeh in, ama hi Hatchungnung pen Pathen tin iheuve (Isa. 7:14, 9:6-7, Luke 1:31-38). Pathen Chapa Jesu Christa tahsan ho hi eihon christian tin iheuin, chule mihem hi Pathen in thilsem dangho sanga achom jep a anasema, ama limle mela asem anahi (Gen. 1). Thilsem dangho hi Pathenin ama lim le mel pua anasem aumpoi.

Pakai Jesu toh kamchenga kihou Paul in aheddoh chu, vannoi kistem doh masanga Pathenin mi hem agonsa ahi ti imuvin, chule mi hem chu Pathen chapa sunggila ki sem anahi. Hiche mihem hin kisuh mona nei jongle Pathen chapa'n ahuhhingthei hia ahi (Eph. 1:4).

Pathen amatah in Jesu mi hema apen ding hi ana seisa ahi (Gen. 3:15). Pathenin nehing beh in tia aseisa chu mihem tenin anelhon tan, sei ngai lou jeh in akipal lhon tan ahi. Hiphah chun, Pathen Lha gaovin mihem aumpi tapon, Pathen Lhagao in adalha tai. Ahinla Pathenin mihem hi angailu nalai in, mi hem hinna bulpi Pakai Jesu atahsan leh Jesun ahuhhingna dia, tonsot hin na lhagao Pathenin apeh ding in, ahin ngaito tai. Hijeh chun Old Testament a Jesu hung penna ding thu kisei tampi aume (Isa. 7:14, 9:6). Jesu hung penna ding melchihna ho

thum dia Isaiah themgaovin ana sei ahi (Isa. 7:14). Chamna lengpa kiti naosen khat pen ding (Isa. 9:6), Old Testament a kihe phel phol, anahi chu atahbah ahungso dan kimu doh ahitai (Lk. 1:31-38). Tuhin, ahethem ho din, mihem tapou Pakai Jesu tahsan jouse sunggila Pathen Lhagao chenga, chamna amaho hingkhom uva, hichu kipana Christmas tia ei hon kum seh a iman jinguh ahitai.

(Dr. T. Lunkim)

Mihemte lah a chamna

Vannoi leiset a chamna um talou dan ahi. Gam khat le gam khat kihoto, mihem nam khat le khat kitheida to, kimat, kitha, kibol gen theina, sumdei jeh-a mihem kigua kijoh, hitobang ho aum jingtai. Ahile Jesu hung pen jeh-a chamna kiti hi hoilam gei-a hitam? Chamna hi idei cheh un, iholmo tauve. Hoi-a kisel tam? Chamna deldoh koi ham?

Jesu Christa chamna leng chapa, Emmanuel, "Thu chu tahsa phe ahung soh in, ilah uva ahung chengin" ahitai (John 1:14). Bible in "Hinna kilhen un, Pakai na Pathen ngailuvin, athu nit un" tin aseie (Deut. 30:19-20). Jesu chu chamna thu hilchenna hung ahi sangin ama tah chu chamna ahi. Ahinla christian ho lah a chamna hi uma hinam? Um tobang ahi. Koi thepmona ham? Ihet chen diu chu, Jesun mihem sung lama chamna apen ahi, polama ahi poi. Jesu chenna muna chun hahsat

Pathenin eilungset danu

"Ajuh chu Pathenin hibang a hi vannoi angailut ahin, koi hijong le atahsan chan chu mang thah louva tonsot hinna anei theina din, achapa changkhat chu apetai" (John 3:16). Hiche Bible chang hin, Pathenin asemsa mihem angailut dan, a-it dan, ahomtho dan aseie-in ahi. Mi hemin damun ajot tah ding jeh chun alung heina diuvin, achapa khat seh aneipa chu mihem thi khela thidin lei-a ahinsol jenge. Eiho leiset mihem ten vang mi khat hinna din, ichapa changkhat chu athi din kisol ngam ponte. Amavang Pathenin hichu abol ngame. Eilungset behseh jeh-u ahi.

1. *Gel lhuhna tha* : Ngailut kitihi lungthima kon ahi. Igelu chu ihinau ahi jie. Ngailutna lungthim in, lungsetna thilgon anei jin, khat le khat kihet themna asem doh jie.

2. *Pehdohna tha* : Lungsetna min napeh ding nadei leh nangin napeh masat ding ahi. Ngailutna nahapeh doh chana nangin jong nalemu ding ahi. Ngailutna hi kinungmu ding gel louva pehdoh ngai ahi. Mi ihepi a ahileh min jong eihin hepi ahi. Nanung mu ding khoh sah louva ngailutna hi napeh doh angai-e.

3. *Jabolna tha* : Najabol masat louva ahile mi chu ahiloule thil chu, nangailut joulou ding ahi. Nakidah mi ho jeng jong chu, najabol masat louva ahile ngailutna mujou pon nate. Min eijabol theina dia, en jabol

gentheina lah-a chamna aumin, ki vet dana lah a kingailutna aumin, miho lunglah na muna kinepna aum jin ahi. Hijeh hin, Jesu hi cham na leng chapa akiti. Ama chamna hi ama tahsan ho dia ahin, ama helou le henom louho lah a ding ahipoi. Jesu hi leng chapa chamna neipa, chamna hom theipa chu ahi. Hijeh hin, Luke 2:14 in, "Leiset a alung lhaina mite chungam leng hen" ati. Thil gilou bola, ase lam bolnom ho chungam Pathen lunglai lou ahi.

Tulai khanga Christmas ki man dan jong hi tahsa lam le lha gao lam kichoh hela ahitan, lhagao lamin alepna dia man angai-e. Vannoi pumpia kimang ahi jeh in, mun chom choma pat chondan jat chom chom toh kimanthaa ahitai. Santa Clause, Christmas Card, Christmas gift, Christmas tree, leh Christmas nehkhom kiti ho hi Jesu penni chun umponte. Ahinla akum akuma iman tengule hachangpaa kipana inei diu hi, tahsaphe lam lepsah sanga lhagao hinkho lamjoh lepsah ngai ahi (Luke 2:10-11).

Vannoi mihemte hatah a lungsetna nei Jesu Christan, vantil hon niseh a ajenlena nom tah a aum sahna van gam ahin dalhah a, lei-a mihem khat hina hung hingpa hi, koi dia genthei hahsa ahung thoh ham, keima van gam lutna thei dia, aman hijatpi hi ahung thoh ahitai, ti gela Christmas hi Jesu loupina dia leh ama dei lama man ngai ahi.

masat ding ahi. Hichu Bible a itu tu i-at ding ati khu ahi (Gal.6:7).

4. *Golcha hina tha* : Ngailutna dihtah nadei leh gol phatah nanei masat angai-e. Kitahsan tona aum tengleh golcha hina akisem doh thei in ahi. Mi khat chu koitoh kilou em, tia het chu ngailutna dihtah ahipoi. Itobang mi ham ti nahet chet a lung ni tilouva nalungset tengle golcha hina hi nasem doh thei ahi. Golcha hina hi nangin nasem doh masat ngai ahi.

5. *Dondana tha* : Mi khat setna chu nadonda a, ama chu nangaidam dam jeng joule aman nahin ngailut ding ahi. Hijeh hin, ngailut leh ngai dam hi akikhen theipoi. Jesun ingai dam jounau hi aman eilungset behseh jeh-u hi ahi. Eiding tina lungthim jong kipailha ngamji ahi.

6. *Kihou theina tha* : Mi khat toh lungtho bei-a ikihoulim tengle chule lung thengsela, imchep um louva ikihou lim tengleh kitahsan tona ahung kispah doh jin ahi. Nangin na ngailut miho henga, ama ho nangai lut dan chu nahet sah angai-e. Kitahsan tona, kihou theina ho hi kilung setna bulpi ahi.

7. *Dindetna tha* : Ngailutna dihtah nanei noma ahile ngailutnaa hi nadin det angai-e. Ngailutna hi hinpi jeng ding ahi. Chutile min natahsan intin nadin detna chu min nahin sonna hi ding ahi. Lungset tobang, lungset lou tobanga mi khat nabola ahile ama chun nason louhel ding ahi. Hijeh a chu ihinaa chu dindet ngai ahi.

8. *Itna tha* : Thil itje het angai-e. Pathenin eiho i-it behseh jeh un, Jesu eihin peuve. Nang dingle mi dia phachom ho chu it ding khohsah in, Pathenin nalungsetna hi it in, na it louleh Pathenin nalungset dading, damun lam joh a nache ding ahi.

9. *Tohkhahna tha* : Ngailut jeh a kitongkha ji ahi. Jesun mipah angai lun, athamin, atongkhan, adamsah in ahi. Ngailut vetsahna chu tohkhah thamkhah hi ahi. Jesun atohkhah ho chun damna anei-e. Jesu tongkha ho chun, Jesua kona damna anei uve. Ajeh chu Jesun atongkha ho chu alungset in ahi.

10. *Sonna tha* : Mi khat itahsana ison tengle aman jong eihin song jin ahi. Jesun eingailutna hi tahsana son ding ahi. Ison tengle achunga kingai akihin, ikingai tengle aman eidia thilpha tampi eibol peh jie. Nason lou mi chun, nang jong nason lou ahi. Hijeh chun Jesun eingailut nau hi, song jingute. Chutile aman tonsot a hin jingna thilpeh eipeh uva, hingle dama ium jing diu ahi (John 3:16).

Jesu Pathen ahi

Pathen atheng ahi. Pathen in leiset mihem ama tahsan ho henga, kei kathen bangin, nangho jong theng un, tin ana sei-e. Jesu Christa, Pathen chapa hi atheng ahi. Ajeh chu Pathen Chapa Jesu jong hi Pathen ahi. Chule Lhagao Theng tia ihet-u hi, natong jing leh mihem kithopi jing khat ahi. Ama hi Pathen

Lhagao tia jong het thei ahi. Hijeh chun Lhagao Theng jong hi Pathen ahi. Mihem chihna le hetna in hiche thu hi sohpha hih jongleh tahsan thei hih jongle *ahi chu ahi* ahin itahsanu ngai ahi. Jesu Pathen ahi, tihi noi-a kihilna ahin, hechen ute.

1. *Jesu atil abula kipat um ahi* : John 1:1 in, “Semtil chun thu ana umtan, thu chu Pathen toh umkhom ahin, chule thu chu Pathen masap ahi” tin asune (the word was God). Tahbeh a sei din, Pathen toh thu chu umkhom ahi. *Thu* ati hi, Jesu ahi. Hiche *thu* chu Pathen ahi. John 1:14 in, “Thu chu tahsaphe ahung soh in, ilah uva ahung chengin ...” tin asune. Thu hin Jesu aseina ahi. Baptist John in, “Kanunga hungpa khu aum jingsa ahi jeh in, kei sang in achungnungjoi” ati (John 1:15).

John 8:58 a, “Abraham pen masanga jong umjing keima kahi” tin Jesun ana sei tai. Hia ‘keima kahi’ tia asehi Exod. 3:14-15 toh sim kah leu chun Jesu jong Pathen ahi dan hethem tauvin nate. John 3:13 akisima ahileh lei-a ahung pen masanga jong Jesu hi ana umsa ahi, ti akihei. Athia athodoh jou chun Jesu hi tilla anachenna vam gama akile kit tai.

2. *Jesun Pathen min apoi* : Isa. 42:8 a, “Pakai na Pathen keibou kahi, ka loupina koima dang pe pong ting ...” tin akisune. Chule Matthew in Isa. 40:3 asutnaa hin, Jesu hi Pathen ahina aphon doh in

ahi. John 20 ahin, Jesu Pathen ahina kicheh tah in akisei doh in ahi. Thomas umlou pet in Jesu seijui ho henga ana kilah in, Thomas henga ahing doh kit Jesu, seijui ho henga ahung kilah thu chu seijui hon anasei uchun, Thomas in thingkil in Jesu khut asut na maha kamit tah-a kamu masang in tahsan jeng ponge, tin amaho henga anasei tai. Akit Sunday chun Thomas um pet in seijui ho henga Jesu ana kilah in, Thomas in kichen tah a Jesu amu phat chun, “Ka Pakai le ka Pathen” anati jeng tai (John 20: 24-29).

Isaiah 44:6 a Pathenin, “Kei hi apatna le akhonna, kachang seh a Pathen kahin, kei tilou Pathen dang aumpoi” ati. Chule Rev. 1:8 a Pathenin “Keima Alpha le Omega kahi” ati. Chule Rev. 1:17 a Jesun, “Keima akipatna le akichaina” kahi anati. Jesun solchah John henga hi tia anasei ahi. Chule Rev. 22:12-13 akisim leh Jesun “Keima Alpha le Omega, amasa le anukhah, akipat na le akichaina kahi” tin anasei-e. Hiche hin Jesu hi Pathen ahina asehi chet ahi.

Bible mun danga jong Jesu Pathen ahina akisei-e. Jesun, “Kapa le kei khat kahi lhone” tin jong ana sei-e (John 10:30). Eiho mihem lungthimin vang sohpha lou ahiala, Pathen hina chu John in hitia aphon doh ahi. Het hahsa sa jousen, athi jouva van gama alhun teng he them tante. Leiset chihna hetna themin asophah jou hoi vang ahi tapoi.

Houbung ho chihtheina ding

Tulai hin houbung ho hi akivet leh tahsanna lama dailha jep jep in akimui. Hitia achepeh leh phat khat leh houbung ho hi kiloi khomna mai-mai bou hung hiding ham, tia kichatna aumtai. Pathen panna lou, houbung hung hikha leh achemang pai pai dingin aume. Kichih thei ute. Vetan, houbung sunga houbung mi Pathen lama hat beh lou, aching athem, ahaohon bou thu ahin nei diu kichat aume. Houbung sunga chile nam, phung le chang, insungahung kive diu, houbung sunga kidei chomna leh maipha vetna hung tam ding, hou-in hi mihem kichoi-atna leh kisei phatna mun hung hintin, van gam thu seingam jong mi lhomcha hung hinte.

Hou-ina thutah sei sanga houbung lamkai te kipana ding leh lunglhaina thu sein, hou lamkai ten ahin man diu, ajeh chu lamkai ho ki pana leh jahnong ding ho sein, aman louvu leh lhalo asan lou diu chu ahin gin diu ahitai. Hiteng chule thutah hi hung kiholmo cheh cheh intin, Pathen jong kithai mang khat ta ding ham, tihi kichat aum pantai. Hou-in hi anei jouten kivon hoi tah langna leh nei jou vetsahna muna ahin nei uva, Pathen lunglhaina dia thutah sei ding ho thusei-a kouji sanga, mi lunglhai thei leh mi kipana seithem ho thupi sei-a hung pang uva, lhez-a kilha gama, adih le atah seingam mi hung kilhom cheh cheh tading ham ti kichatna aum tai. Mi

7

tamtah in, Pathen natoh sanga, ama insung semhoi masat joh ding ahin khoh sah diu hitam, tihi akilang pan tai. Ima khat hi Pathen thun apha poi, tisanga ama sei adihjoi, tulai khang din, tia dinpi mi hung tam ta mai din aume.

Houbung kihouna hoa thu adih lama pui sanga, mi lunglhaina hol hung tamjo ding, tahsa thu le hou thu ahin mankop jeng diu, ima cha achen avai, adih leh adih lou umthei lou ding, chule Pathen thu pha le thudih seiho sanga, politician hon thu ahin nei joh diu, aseithem chu hung kijui ding hitam ti jong kichat patna akinei tai.

Lhagao miho sanga thu sei them leh lekha them ho hung kihol ding, aching athem abol thei ho joh houbunga hung thu nei diu, vannoni chihna thepna hon, houbung ahin thaset sah diu, akimui. Tillai chun Pathen thusei hon, jan pon kipoh in, chule kengin anavah leuvin, amaho chu sonlel melpu ahijeh un, Pathen Lhagao in akilhon pin ahijeh. Tulai miho hi gari car in apui lele tan, masanga thusei ho chu athing pel kiput pumin ana vahle leuvin, tulai miho vang hi, thuneina leh thaneina (power) in apuile tauve. Lhagao Theng kikai hoisah sangin, chih na thepna ho joh asong un, hichu akikai hoi sah uve. Hiti ho jeh a hi, tulai houbung ho kihon phat ngai ahitai. Hetman louva illoh mang diu atame. Pathen dih tah a houdin kiha bol ute.

- (L) Rev. Seikholen

Tillai a Palestine gam

Jesu khang lai a Palestine a chun theiba (fig) leh olive thing phung ana hake-in, chule amaho anchang chu Gehu (wheat) chule Barley anahi. Palestine hi Arabia koma um ahin, Mediterranean Sea solam vapama um ahijeh. Hiche gama hin Palm Tree thingphung atam ke poi, ajeh chu phalbi teng adap in, hiche thingphung hon adou joupon ahijeh. Palestine gam asah lama hin Galilee aumin, go anengin, twi jong anengin, chule alailung tah a Samaria aumin, chule hikoma hin leipha phai cham phabep jong aume. Ahinla Palestine gam anoilama hin Judea aumin, gamgo ahin, ima jong keh beh seh lou ahijeh. Hijeh chun Judea gama mi acheng behseh pon ahijeh. Palestine a cheng miho hi akhang tou pouvin, vaicha tah ahivun, hijeh hin Jesu jong hikoma analeng jing ahijeh in lou lhouho lah leh ngaman ho lah a apha atamjo ana sumangin ahijeh.

Palestine a cheng ho bouvin Pathen ana houvin ahijeh. Palestine kimvel a cheng hon Pathen anahe pouve. Avela gama chenghon lim semthu, gammang ho, twisam put ho, chule songtum ho pou anahou uvin ahijeh. Amahon pathen a ahovu chu anatam lhez in, Pathen khat seh kiti chu ana hedoh pouve. Ahinla Palestine a chengho hi Israel chate ahivun, Pathen khat seh bou chu ana houvun ahijeh. Palestine khopi chu Jerusalem anahi (capital). Thempu

8

chungnung hikoma ana chengin ahijeh. Hou lama kikhopna len len ho abon in Jerusalem hou-ina ana kibol jie. Kho jousea hou-in (synagogue) ana umin, hia hin hou thudola kihilna ana kibol jie. Jesu jong synagogue hoa thu ana sei jin ahijeh. Mihon ama thusei chu ana ngai nom mama jiuve.

Hiche lai chun danthu he le Pathen thu jih a pang pen ho chu Pharisee ho ana hiuve. Sadducee ho chun akijihsa Pathen thu chu pumtah in ana tahsan un ahijeh. Ima akoibe nom pouve. Ahinla Pharisee ho chun hou lama chonna ding danthu tampi jong ana sundoh un, hichu jui din mi anahil un ahijeh. Samaria mite Palestine a ahung chennau hi 722 B.C. chu ahin, Assyria miten Palestine gambek khat Samaria kiti hi ahin lah phat un, amaho mi ho Samaria gama hin ahin chensah tauvin, ahinla Israel chaten amaho hi nam theng lou danin ana lauvin ahijeh. Amaho hin Pathen khat seh atahsan vangun, Jerusalem hou-ina Pathen ana hou pouvin, Gerizim mola bou ana hou un ahijeh.

B.C. 63 chun Rome ten Palestine te khopi Jerusalem ahin lauvin, chule Jesu khanglai chun Rome ten Jerusalem hi amaho khut noi-a ana koi chah kheh uvin ahijeh. Chule Judea leh Samaria chu jong Rome te khut noi a ana umin ahijeh. Palestine hi Canaan jong akitin, chule Middle Ages lai chun Holy Land jong akiti. Israel ten ahinlah jouvin Israel jong akiti.

Huhhing nahi tah em ?

Huhhing kahina dia ipi ka bol ngai em ? tia min thudoh anei tengle Bible in iti adonbut em ? Hi che donbutna chu ahile koi chun hi che hi ahin doh ham, chule ama le a Pathen kigui jopna tupet a itobang ham, ti het masat a chule donbut ding ahi. Solchahte lekhabua mun thuma hiche thudoh hi akidongin, akidonbutna jong chomjep jep anahi (Acts 2:37, 16:30, 22:10).

Pathen pumhet louhel khat in adoh ahileh ama chu Pathen chule Jesu Christa tahsan sah masat a chu jou tengle donbut ding ahi (Acts 14:15, 17:23-27). Pathen themkhat atahsan masat loule huhhingna thu asang theipoi. Jesu het kiti jonghi ni a khen thei ahi. Jesu kisan louva jong Jesu tahsan thei ahin (John 12:42), chule mi loi khat in Jesu akisana chu le athu ajuu lou thei jong ahi (Mt.7:21).

Jesu tahsan mi chun lung ahei tei angai-e. Lunghei kiti hi chon set nomna lungthima kona jamdoh chu kiseina ahi (Acts 12:38, 3:19). Lungheina aum loule sochatna um theilou ahi (Lk.13:3, 2 Pet.3:9). Jesu tahsan khat in, muthim hinkhoa kona khovah hinkho ahin manpat tengle aman huhhing ahina dia pan alah ngai ahi. Atahsan akicheh tengle Baptise ahi angai-e (1 Tim.6:12). Hi chu achonset ngaidamna dia twi lut ahi (Acts 2:38). Mi khat chu twi leh Lhagaova apen kit loule Pathen leng

gama alut thei poi (John 3:5). Sochatna hi Christa jala hithei ahin (2 Tim.2:10) chule Baptise chan hin mi khat chu Christa a ahisah ahi (Rom. 6:3). Hijeh chun sochatna dia Baptise chan hi ngai ahi (Mk.16:15). Ahile Baptise achan jou le huhhing ahi theina dia ipi abol ngai intem ?

Ama chun niseh a atahsan ahah cheh chehna dinga akihabol ding angai tan (Acts 2:42), chule achonset ngaidam ahina dia asetna ho agel doh a Pathen henga alut jing angai tai (1 John 1:7-10). Pathen hou-in a che jinga, Pathen ajena, Pathen thu anit a, thu chu ajil jing angai-e (Rom.12:1-18).

Ahileh, huhhing hina dia mi khat in ipi abol ngai em ? Kon hiche hi adoh ham, het masat angai-e. Pathen helou mi ahile Pathen tahsan masat sah ding ahi. Atahsan sa ahile atahsan chu miho ahettah sah a aphon doh jing angai in, chule alung ahei angai-e. Jesu tahsan pou pou chu Baptise chansah jong angai in ahi. Chujoule ama chun Bible thu sei ho phatecha ajuu jing ding ahi.

Christian dih tah hia Pathen toh kinai tah a ahin tengle Pathenin ama dia ipi atohpeh ding ham, tichu Pathenin ahin kingaito ding ahitai. Ajeh chu Pathen hi son umtah ahin, achate angailu jinge. Ama tahsan ho chu Pathenin atheida naisai pon, aki papi joh in ahi. Pathenin christian dih tah ho jouse lamdih hil jing taken.

Nui-hi damna (Prov.17:22)

* School a ojapi athah khat ahung kainin, chapang ho henga, “Nangho lah a mingol kahi, tia kigel ho chu ding doh un” anatile koima ading pon. Chomkhat jouvin numei khat ahung ding doh in, ojapin ahenga, “Neinu, nanghi angola kigel nahi ham?” tin ahin dongin ahileh ama nun, “Ojapi, nang bou nachanga nadin chu phamo kasan, kahin din khompi nahi” anatin ahi.

* Anun thil achoh pet in achapa lampama ana dingin, ahenga pasal khat ahungin, “Chapa Post Office lampi nei hilin ati.” Chapangpa chun “Che jang pet in, in thum nakhokal joule najet lam vele chun ahitai” tin aseipeh-e. Pasalpa chun ahenga, “Kei hikoma Pastor thah hung lhung bep kahin, mapni leh hou-in hung kai in, van gam lampi kahil ding nahi” ahinti. Chuin chapangpa chun, “Post Office lampi bon helou chun khubanga gamla van gam lampi he pon nate” atin ache tai.

* Nupi akum tamthim khat in, ki hoi sahna lou, adong thima kimu theina lou ho achon, akinu jouvin, ajipa henga, “Nangpa, nei hin vete, kakum hi ijat hitante natim” anatin ahile amapan,

“Navun kavet leh nakum 20 hintin, nasam akivet leh nakum 18, chule natahsa akivet leh nakum hi 25 hinte” anati. Amanun, ‘Kakipah tave, chomkah louvin kadong hut jenge’ ahinti leh amapan, “Khongai

temo, hiche ho sese chu kahin gop khom nahlai ding avat-e” ahinti.

* School chapang khat hi exam ki seidoh nin, lunggim tah in hostel ah ana touvin ahile, aloipan, “Ipi lom lom nabol khela na mark hibanga lhoma hitam?” tin ana dongin ahile aman, “Kei jeh ahapon, mi khat jeh ahi” anati. Aloipan, “Nangin exam bola iti dana mi joh nangoh ham?” tin adongin ahile aman, “Exam teng a kakoma toujipa tuchunga ahung toulou jeh ahi” akiti nomselin ahi.

* Pasal khat hi a tolop kalta louhel ahi jeh chun, a Boss koma, “Pu, tukal nilhah leh kama pot doh angai tai, ajeh chu kasum san hin insung avah jou tapon, jan le Auto katola sum kahol angai tai” ahinti.

Chuin a Boss pan, “Aphai, aphai, nama che thei ahi. Ahinlan jan lai a, nagil ima akela ahile lamka soma hotel neocha a khun hung jitan. Hia chun ken jong janin hotel kabolin, sum kahol bei” anati.

* Von khuipa khat city bus a ana touvin, aman jong dukana ahin ngan se, anoiya natongpa henga hitin phone abole, “Tu haath kaatke rakh. Uska gaala to main aakar kattungga...” atile Bus a touho chu akicha gam tauve.

Bus chu next stop-a ahung kingah leh asunga tou jouse chu, akumlha soh kei un, asunga toudena chu gari tolpa, conductor pa, chule von khuipa bou ana hidohtai.

Het-a phachom ho

* Tulai hin, Online a gari joh, thil dang joh aumin, athil manu alhom jeh in min atahsanin, a bank account uva sum advance athot jiule, sum amu jouvun, a number a kikou doh jou talou, address apeh houva jong kihol doh jou talou, hitobang jouva sum hol mi atam tai. Ana kichih thei uvin.

* E-cigarettes (electronic cigarettes) kiti jong hi akichep leh meikhu soh lou ahin, avela hon akhu akijoplut pon, apha ngap in ahi. Tulai a ahol chil doctor ho mudoh vang chu, hi che churup (dumchep) mangcha ho hi chop nat kidang tah in ahinpha jiuvin, hichu eiho lou aumsa hon asudam theipon thina bailam tah asoh-e. Man louvin apha, atiuve.

* 'Pathenin eisong behseh pon ahi. Kathoh joulou ding genthei hahsatna eipe ponte, ti katahsane' tin Mother Theresa in ana sei-e.

* Lha (Lhathah) sunga akenga ana vale chun, Neil Amstrong hinkhoa kikhelna ana pepon, ahinla Jesu toh akilhon a konin ahinkho kikhelna ahin nei jon ahi.

* Vannoi leiset a numei achi papen nu chun ama kum 36 alhin chun cha 44 ana nei-e. Tulai hin acha 44 chu achang seh in avah in ahi. Jipa khat seh a konin, pengkop 5, thum thum penga 4 vei, acha li li pengah 5 vei anahi. Adang teni hi achang changa peng ahi.

* North East sunga kho ho lah a atheng pen hi Vanghmun kho, Tripura sunga um hi ahi.

* Kama kinelut ho eh-a ahung ki thah doh kah hi phat asot lut jie. Chapanga hi upa nupi a sangin agang jep in ahi. Nupi upa hon aneh lut-u, eh-a ahin thah doh kah hi pung 53 vel ahin, chapang in aneh lut, eh-a ahin thahdoh kah hi pung (konta) 33 vel alut-e.

* Nasam nakiche khel leh chom khat kishih in natin, ji nanei khel leh nahinkhoa nakisih ding, chule nahin khoa Jesu nakisan louleh tonsot a nakisih ding ahi. Nahinkho lampi kivet tup in.

* Khomei kum 2020 le, *Palm Sunday* April 5, *Good Friday* April 10 ahin, *Pentecost Sunday* May 31 ni ahi.

* Jesu kikhaina thing cross achung lama khun, INRI akisune. Hiche hi Latin paova kon ahin, 'I' hin IESUS ati ahin, 'N' hin Nazarene ati ahin, 'R' hin REXO ati ahin, chule 'I' hin IDONEUS ati ahi. Hichun 'Nazareth mi Jesu hi Judah (Jew) te lengpa ahi' atina ahi (Jesus the Nazarene King of Jews).

* Tulah numei leh chapang gu atam lleh tan, achanga chapang, numei vathang louvin apha. North East sunga jong aum tai. Mivaicha sum dei ho sum holna ahi. Milen dom ho amat ule asunga athin, achop, akal, kitiho ajoh-u danin akisei in ahi. Numei le chapang ho nahet beh seh louvu mi toh kinai chaa nakihou ule namat tomuva, lou nanah sah uva, agari uva napohmang jeng thei-u ahin, kichih thei angai-e.

Christian Meivah - sim te taona akiman peh jinge. Sumto kuma Rs. 100/- ahin, asim nom hon hin peuvun, sum napeh lhaa kona kum nakisim peh ahi. M.O. hin thot hon Editor kipe ding lekha beh a namin le address suntei un. Editor pu Mobile No.94355-51080 ah hin hetsah un. Manipur le Naga land a sumto peh na thei ho :-

- 1) Miss Nemhoichong Haokip, KBC
- 2) Rev. J. Manchong (Lunpu), KCC
- 3) Rev. Lhoukholal, Kangpokpi Missn
- 4) Mrs. Veikholam, Ideal school, ccpur.
- 5) Mr. Henkai Lenthang, Medziphema,
- 6) Mr. Seikholon Singsit, Kohima.
- 7) Mr. ? (Kapcha), Dimapur.
- 8) Mr. Minlen Lhungdim, Mizoram

Het-a phachom ho

* India in Republic Day amasa pen 1950 a anaman chun, Chief Guest in, Indonesia gam President masapen Mr. Sukarno chu ana kouvun ahi ... India Republic Day manna a numei Chief Guest dia ana kikou masapen nu chu Thailand gama Prime Minister anahinu Yingluck Shinawatra anahi.

* Netaji Subhas Chandra Bose anapenna mun hi Odisha gama Cuttack ahi ... Vannoi gam ho lah a alenpen Russia ahi ... Gam neopen Vatican City ahi ... Gam lah a mi chen tamna pen China ahi ... Neldi gam (desert) alenpena kihe hi Antarctic Desert ahi.

Christian Meivah
November - December, 2019

PRINTED MATTER

To :

Editor :
Rev. M. Haakhothong,
C/o, T. Manchong
Nichols Higher Secondary School, Saitbari,
P. O. Rehabari - 781008, Guwahati, Assam.